

मार्निंग डोगरी न्यूज़ बुलेटिन,

समा. 09.20 Hrs

<><><><><><><><><><><>

Headlines

- उपराज्यपाल मनोज सिन्हा होरें जम्मू च आयोजित कवि सम्मेलन दरान कविएं गी आग्रैह कीता जे ओह अपनिएं रचनाएं दे राहें एकता गी मजबूती देन। मन्ने-परमन्ने दे कवि कुमार विश्वास होरें बी इस कार्यक्रमै च हिस्सा लैता ते जम्मू-कश्मीर गी आध्यात्मिक ते सांस्कृतिक समृद्धि आहली धरती करार दिता।
- मुखमंत्री उमर अब्दुल्ला होरें आखेआ ऐ जे उं'दा मंत्रिमंडल नौकरिएं च आरक्षण आहली बवस्था गी युक्तिसंगत बनाने लेई अगली बैठका दरान इस मामले पर चर्चा करग।
- मुख सचिव अटल डुल्लु होरें नशीले पदार्थे दी कवैतू खलाफ जम्मू-कश्मीर दी रणनीति गी मजबूत करने लेई नीति आयोग कन्नै सलाह-सूत्र कीता ऐ।
- पुलवामा च जैशे मोहम्मद गुट दे इक गुप्त ठिकाने दा पता लाइयै सुरक्षाबलें उं'दे इक मददगार गी गिरफ्तार कीता ते कन्नै गोला-बरूद बी बरामद कीता ऐ।
- जूट मार्क इंडिया योजना गी बढ़ावा देने लेई जम्मू च पैहली-पैहली जागरूकता कार्यशाला दा सरिस्ता कीता गेआ।

<><><><><><>

LG- Kavi Sammelan (Byte-2)

उपराज्यपाल मनोज सिन्हा होरें शुक्रवार जम्मू- विश्विद्यालय च पावर ग्रिड आसेया आयोजित कवि-सम्मेलन च बोलदे होई कवियें ते लेखकें गी एकता गी बढ़ावा देने ते कश्मीर घाटी च युवाएं गी कट्टरपंथी बनाने दे अलगाववादी जतनें दा मकाबला करने लेई युवाएं गी प्रेरित करने लेई आखेया। उनें आखेया जे राश्ट्र निर्माण ते समाजी तालमेल गी मजबूत करने लेई साहित अहम भूमिका निभांदा ऐ।

श्री सिन्हा होरें सदभाव ते राष्ट्र गी होर मजबूत बनाने आस्तै क्षेत्रीय साहित्य गी बढ़ावा देने उप्पर जोर दिता ते आखेया जे कला-संस्कृति लोकतांत्रिक मूल्यें गी पोशित करदी ऐ ते समाज गी बदलने च टकोदी भूमिका नभांदी ऐ। उनें जम्मू-कश्मीर दी सांस्कृतिक विरासत गी होर मजबूत करने दे जतनें उप्पर लौ पाई। उनें आखेया.....

हिंदी दे मशहूर कवि कुमार विश्वास होरें बी इस कवि सम्मेलन च हिस्सा लैता ते जम्मू-कश्मीर गी समृद्ध सांस्कृतिक विरासत ते आध्यात्मिक महत्व आली धरत दस्सेया। उनें आखेया जे इस धरत दे महान विद्वानें ते सूफी परम्पराएं दा इतिहास कवियें ते कलाकारें गी प्रेरित करदा ऐ। उनें श्रोताएं गी आखेया जे ओ बक्ख-बक्ख घटनाएं उप्पर ध्यान नैई देन। उनें जम्मू-कश्मीर दे प्रति राष्ट्र दे सम्मान उप्पर जोर दिता।

<><><><><><>

CM Reservation

मुख्यमंत्री उमर अब्दुल्ला होरें आखेया ऐ जे मंत्रिमंडल तौले गै नौकरी लेई आरक्षण गी तर्कसंगत बनाने दे प्रस्ताव उप्पर चर्चा करोग। उनें आखेया जे सरकार नै Model Code of Conduct ते चुनां खत्म होने गी बलगेया ऐ तां जे कुसै बी जटलिता थमां बचेया जाई सकै। मुख्यमंत्री होरें आखेया जे सरबन्धी मैहकमे दे मंत्री इस प्रस्ताव गी उसलै पेश करगंन- जिसलै मंत्रिमंडल दी अगली बैठक होग। उनें एह गल्लां नैशनल कांफ्रेंस दी दो-रोजा कार्य समीति दी बैठक मगरा आखी।

<><><><><><>

CS Drug Abuse

मुख्य सचिव अटल डुल्लु होरें केन्द्र शासित प्रदेश च नशाखोरी दे खलाफ इक व्यापक रणनीति बनाने लेई NITI आयोग दे सदस्य डाक्टर वी.के. पाल हुंदे कन्ने उच्च स्तरीय बैठक कीती। AIIMS दिल्ली- PGIMER चंडीगढ़ दे माहिरें ते जम्मू-कश्मीर दे वरिष्ठ सेहत अधिकारियें इस बैठक च हिस्सा लेया। इस बैठक च प्रवर्तन-परामर्श-इलाज-पुर्नवास ते समुदाय दी भागीदारी उप्पर ध्यान दिता गया।

डाक्टर पाल होरें जम्मू-कश्मीर दे समग्र दृष्टिकोण दी सराहना कीती ते हिमाचल प्रदेश दे सफल मॉडल गी अपनाने दा सुझा दिता। इस बैठक दा मकसद जमीनी स्तर उप्पर परामर्श गी मजबूत करना- मरीजें दी सेवा च बाददा करना ते पूरे यू.टी च मादक पदार्थ दे दुरुपयोग कन्नै निबड़ने लेई इक मजबूत ढांचे दा निर्माण करना हा।

<><><><><><>

PM MKB

प्रधानमंत्री नरेंद्र मोदी होर कल 30 नवम्बर गी अपने रेडियो कार्यक्रम “मन की बात” दे राएं देश-बदेश च रौहने आहले श्रोताएं कन्नै अपने बचार सांझे करडन। हर म्हीने दे खीरले ऐतवारें दिनै 11 बजे प्रसारित होने आहले इस कार्यक्रम दी एह 128मीं किशत होग। एह कार्यक्रम आकाशवाणी समाचार दी वैबसाईट newsonairmobile ऐप्प पर बी प्रसारित कीता जाग। एहदे कन्नो-कन्नी एह प्रोग्राम आकाशवाणी समाचार, DD News, प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी प्रसारित कीता जाग। आकाशवाणी जम्मू पर मन की बात दे तुरत मगरा एहदा डोगरी भाषा च अनुवाद प्रसारत कीता जाहग। डोगरी अनुवाद स्हाड़े श्रोता कल राती 8 बजे इक बारी परतियै सुनी सकदे न। आकाशवाणी दे क्षेत्रीय समाचार एकांश कल्लै दे मन की बात कार्यक्रम पर इक विशेष परिचर्चा रातीं सांड़े 10 बजे प्रसारत करोग जिसी तुस स्हाड़े इस्से चैनल मिडीयम वेव 303 मीटर यानि 990 किलोहार्टस ते एफ.एम. 100.3 मैगाहार्टस पर सुनी सकदे हो।

<><><><><><>

Awantipora Hodeout

पुलस नै दस्सेया ऐ जे सुरक्षाबलें शुक्रवार पुलवामा जिले च जैश-ए-मोहम्मद आतंकवादी संगठन दी छप्पने आहली थाहर दा पता लाया ते आतंकवादियें दा साथ देने च शामिल इक आरोपी आतंकवादी गी गिरफ्तार करी लैता।

“एक्स” पर इक पोस्ट च अवंतिपोरा पुलिस नै दस्सेया जे इक सूह मिलने मगरा 42 राश्ट्री राइफल्स ते 180 बटालियन सी.आर.पी.एफ कन्नै रलियै ननेर मिदूरा च घेराबंदी ते तलाशी अभियान चलाया गया। इस अभियान दरान जैशे-मुहम्मद गुट दे इक मददगार गी गिरफ्तार कीता गया- जेहदी पंछान Nazir अहमद गनेई दे तौरा पर कीती गई। पुलिस नै दस्सेया ऐ जे इस दरान 2 ग्रेनेड- इक डेटोनेटर ते होर विस्फोटक समेयान बरामद कीता गया ते अगड़ी जांच अजें जारी ऐ।

<><><><><><>

Jute Mark India (Byte)

जम्मू च मय्यारी जूट उत्पादें गी बढ़ावा देने दे मकसद कन्नै जूट मार्क इंडिया योजना बारै पैहली-पैहली जागरूकता कार्यशाला दा आयोजन कीता गेआ। इस कार्यक्रम दा आयोजन कपड़ा मंत्रालय दी टेक्सटाईल कमेटी आसेआ कीता गेआ ते एहदे च टेक्सटाईल कमेटी दे सचिव कार्तिकेय ढांढा, एडीशनल डिप्टी कमिशनर अनुसुया जम्वाल, कपड़ा मंत्रालय, दस्तकारिएं ते हथखण्डिएं सरबंधी विभाग ते जूट बोर्ड दे अधिकारिएं बी हिस्सा लैता। इंदे अलावा केई सारे आप सहायता समूहें दिएं महिलाएं बी इस कार्यक्रम च शिरकत कीती। इस कार्यशाला दे दरान जूट मार्क इंडिया लेबल उप्पर लोs पाई गई जेहड़ा इस गल्लै गी प्रमाणत करदा ऐ जे उत्पाद घटोघट्ट 50 फीसद जूट कन्नै बने दे न। इस सरबंधे च मीडिया कर्मिएं कन्नै गल्ल करदे होई एडीशनल डिप्टी कमिशनर अनुसुया जम्वाल होरें आखेआ.....

<><><><><><>

Volvo Sleeper Coach

जम्मू-कश्मीर दे ट्रांसपोर्ट कमिशनर विशेष पॉल महाजन होरें जम्मू दे ट्रांसपोर्ट नगर आहले अंतर-राज्यी बस टर्मिनल च 40 सीटें आहले भलेआं आधुनिक किस्मै दे वॉल्वो स्लीपर कोच दा उद्घाटन कीता। प्रदेश च अपनी किस्मै दा एह पैहला-पैहला वॉल्वो स्लीपर कोच मुख तौर पर श्रीनगर-दिल्ली रूट पर चलग ते एह जातरिएं गी अरामदायक ते सुरक्षित जातरा दा अनुभव उपलब्ध करोआग। एह कोच बड़ी अरामदायक स्पीपर सीटें, सीसीटीवी कैमरें, एयर-फ्री सस्पेंशन ते वॉशरूम ज्नेही सुविधाएं कन्नै लैस होग।

अधिकारिणं दा आखना ऐ जे एह् पैहलकदमी, जम्मू-कश्मीर दे ट्रांसपोर्ट सैक्टर च इक संगे-मील साबत होग ते एह् इक आधुनिक, सुरक्षित ते जातरिणं दे मुआफिक ढांचा उपलब्ध करोआने दी सरकार दी वचनबद्धता गी फही पक्का करग। इस बारै होर जानकारी दिंदे होई ट्रांसपोर्ट मैहकमे दे कमिशनर विशेष पॉल महाजन होरें आखेआ

<><><><><><>